

Zeit der Kater

Jetzschd se isch wieder do, die Katerzeit.' Oi Feschtle jagd 's andere. 's Weindorf en Stuegert isch grad vorbei ond 's Volksfescht ond dia Kirbena standat vor dr Tür. Nadierlich trenkt mr do gern amol a bissle z' viel, getreu dem Motto: Was de heut trensch, muasch scho morga nemme trenka! I fend des aber so gemein, wie sich die Tierle über Nacht verändertat. Am Obend sieh'sch a schöne Mieze oder a nett's Mäusle, no hosch en Affa, ond am näggschda Morga isch's en Kater.

I onderscheid do emmer zwischa zwoierloi Kater: da Gwitter-Kater ond da 7-Tage-Kriegs-Kater. Beim Gwitter-Kater wacht mr auf, spürt, wie dr Blitz nei'schlägt, ond innerhalb von a paar Sekonda kniesch vor dr Schüssl ond anschließend wirfsch a Familiapakung Aspirin ei. Dr Vorteil: Noch a paar Stond hosch den Kater wieder em Griff, ond spätestens am Obend bisch wieder fähig, zom näggschda Feschtle zom ganga.

Ganz andersch isch dr 7-Tage-Kriegs-Kater. Do hörsch's zwar en dr Nacht kracha ond rompla, 's Bett wackelt ond dreht sich, aber am Morga freisch de, dass de koine größere Kolateralschäda feststellsch außer dem omgsschmissana Nachtkäschtle. Du denksch: „Ha no, des hätt jo viel schlimmer komma könna, bei äll dem, was i xoffa han!“. Aber der 7-Tage-Kriegs-Kater wird meisch-



tens unterschätzt. Der hört deshalb so schnell net auf, weil mr da ganze Körper durchanandr brocht hot. Die Organe gebat ihr sonscht so harmonisches Zammaspiel auf ond schickat sich an, gegaanandr Bürgerkrieg zu föhra. Der post-alkoholische Super-Gau föhrt drzua, dass es im Schädel hämmert ond schlägt wie auf ra New Yorker Großbaustell. Ond dia Körpermitte schickt sich a, a ganzes Fässle Salzsäure gega die Speiseröhre eizusetza. Wenn de no am Obend denksch: „Jetzt goht's wieder“, ond du machsch dr a Nudelsüpple, no merksch glei, wie du dir da letschste Obend no amol durch da Kopf ganga lassa muasch. Des isch der heimtükische Organ-Partisanenkampf. Innerhalb der näggschden Tage muasch halt langsam wieder Friedensverhandlunga mit deim Körper aufnehma. Ond du musch schwöra, nie meh ebbes zom trenka – bis zom näggschda Feschd ... Bis näggschd Woch'

Ihr

Wulf Wager